

**Puteri Umno Buat Laporan Polis Terhadap Anwar
Bernama
6 September 2011**

SUNGAI PETANI, 6 Sept (Bernama) -- Pergerakan Puteri Umno Selasa membuat laporan polis terhadap Ketua Pembangkang Datuk Seri Anwar Ibrahim, yang didakwa membuat laporan palsu berhubung isu video seks pada Mac lalu.

Laporan itu dibuat Naib Ketua Pergerakan Puteri Umno Shahanim Mohd Yusof di Ibu Pejabat Polis Daerah (IPD) Kuala Muda di sini.

Beliau berkata pihaknya memohon polis bertindak terhadap Anwar, yang didakwa telah mempermainkan undang-undang dengan membuat laporan palsu di IPD Dang Wangi pada 22 Mac.

"Kita memandang serius laporan palsu yang dilakukan di IPD Dang Wangi pada Mac lalu berhubung video seks. Ini kerana seperti yang diketahui umum, Anwar tidak pernah mengemukakan laporan dakwaan fitnah terhadap Datuk Shazryl Eskay Abdullah mengatakan video itu tidak benar," katanya kepada pemberita selepas membuat laporan itu.

Shahanim juga berkata Peguam Negara perlu mengambil tindakan undang-undang terhadap Anwar kerana membuat laporan polis yang tidak benar.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=611833>